

Dife dan Kann

Bann lalang rouz-oranz-lor pe danse dan lorizon
Anflame. Kouma serpan disan zot pe ranp ver
Lesiel mov. Marenoir pe vini.
Freser ar so gran kapot
Pe anvelop vilaz san lalimier, san lespoir
Ar so bordir karo kann.
Dife ki pa pirifie, dife ki pa sofe
Dife ki pa amenn lavi,
Dife ki pa detrir,
Dife dan kann,
Dife ki amenn

PROFI.

Li amenn ni koumansman, li lafin.
So laflam kouma bontan dan siklonn.
Menase, grongne, grinse, kriye,
Sifle, irle, krake, ronfle, rabase.
Boukou kouler, boukou mouvman me
Kouma enn miraz li disparet
Pou les tou parey kouma avan.

Chiniraja pe ranpli so poumon ar goudron.
Government warning, smoking
May damage your health.
Li fer enn sourir san konpran.
Enn lafnet dan so labous
Montre so lalang rouz
Deryer ledan zonn nikotinn.

Li plonz dan lamer noir lapay brile;
Lasann profi pe voltize dan lezer.
Kouma tourbiyon li anserkle so lipie,
Mont ziska so nene.
So lakras noir fer mastik
Dan so lagorz;
So poumon ranpli ar goudron;
Dan enn touf fey karbonize
Enn lonbraz pe sirkile
So laserp dan so lame.
So liniver kouma sarbon,
Lasann profi finn vinn mari.

Lenerzi farata-kari-pomdeter
Pe koule lor so fron
Simiz perkal kole lor so ledò.
Lasan profi ek transpirasion Chiniraja
Pe kol realite ar enn mastik.
So poumon ranpli ar goudron.
Government warning,
Smoking may damage
YOUR HEALTH.
Chiniraja
Pa
Anvi
Riye.